

## La čantia del primiziànt.

Fata da Senjeur Battista per la  
mësa nevöla de Senjeur Antöne.

- I. Audidma, audidma, n tël stlupetamënt!  
Čalëdma sun plaza, če fóla de žënt.  
Da santa Krestina, da Bula i Častól  
I tanč da Urtižei k' ië nkúei tló a nõš ból.
- II. Xen čëli i kunšidra tan bõl kël ië fa su,  
De tõi bëi triumfpórten n'a-n pa mò udu.  
Pò sfranži i spënži i uël se fë inant  
Per udëi këi da nõza i l Senjeur Primiziant.
- III. Xën vëni al mòto, k' i sona adum;  
Pu auter k' i vën, i čalëdma če grum!  
Če linğa tan lonğa, če tlap de parënc,  
Amizi i kumpanjes i pekõnc i studënc.
- IV. Dant-òra i skulëies kul guan' da san-di,  
A pèr ból a linğa škel toka da ži;  
L maóster de skola ië ënke leprò  
Per mëter n püe vérda k' i ne fëže vël dandò.
- V. Čalë-ima ai šizri, tan ból k' i se vën!  
Tan bën k' i saudëies, s' astiëli pu xën!  
Ma i a pa nče n áukmòn ke sa kumandë  
Kun zuch i kun n šnait ke l i fëš pròpi tremè.
- VI. Audidma la múžiga! N tël ië n sunè!  
Nkúei dramì ite i la fëži stlëfè!  
De tõi muzikõntri nen aud-un mè prëš:  
Per auter kël mïeni pa bën nče nstëš!
- VII. Čalëdma pò. xën këi ke pòrta i valóns,  
Se stiza i se pròva de trè ti kurdóns,  
Ačò k' i nel zère i nel pëte no žu,  
L fos pa mófun mpò n püe da-ulëi-mël la tò su.

- VIII. La šëfres a blank kun gerlandes sul çë,  
Tan bëla inozëntes ke les fë da nvidjë.  
De bëi pitli anğuli pudës-un i di,  
Ke fësh bëla blëita i la filza da ri.
- IX. I këles da la gerlanda, çë bôl furnimënt,  
Dut plën de spigëtes, blot òr i arzënt;  
Pò zandli i pintes pudëis ve npensë,  
I filzes i varëtes, kel ne fos-cl mèi asè.
- X. Çe žeunes tan šodes i šërics ke l fë,  
Ke tën bëla dutes mèdrë al fat i sië.  
Ži via kël va-les tan plan i zebil,  
Ke dutes de beriëda ne kerpësa n stlòp de fil.
- XI. Ma mò plu zebil, še ulëis kunšidrë,  
Sa danz la neviča da fë i s'astilë.  
Ma fë la neviča a n próve fë n leur,  
Ke fësh a na žeuna desegúr n gran uneur.
- XII. Xën ke udëis l Senjeur Primiziánt,  
Mesëis kunšidrë ke l fë ruvà tan inánt,  
Ke l fë da unerë i ke l fë da nvidjë  
Mò auter plu ke n kòzer i mò auter plu ke n rë.
- XIII. Xën vën këi da nòza, amizi i parënc,  
Duč plëns d'alegrëza, beáč i kuntënc.  
Nši vai te dlëža, na gran prozesiòn,  
I aut la perdika i mësa ku' na vóra devoziòn.



## L ie rië kumprë bestiàm.

«Da kiž ani ne san plu ulà tò n çë de bestiàm da pudei mazë»,  
diš n di l bekë a si fant; »l fos debužën k' i vadiëi keršës sui lëns;  
i a ulei ġatë n pûe na bëla vača da zidlë vëlk, mûesun sautë da  
Ponzio a Pilato.»

«Ie savës bën ulà ke l fos mò na bëla böstia da ġatë», diš Sepl,  
l gran fant; »kla rosa d'andà Bërbla.»

«Këla pòses tu ži a kumprë, še te uës; plu sauri i trapulói  
bën žu n'ana al malan ke i marçadë žu vëlk a kële vödla avarona.»

## La vödla muta.

- I. La iê fata!  
A ve la di duta,  
Îel da'uni mata:  
Son vödla muta!  
In'eurità,  
Nen ës minà.
- II. No, ne fòve nia tan burta,  
I minove ke la fos vënta;  
Bênke n pûe stramba i kurta,  
Fòvi mpò for valënta.  
La ie nši,  
Nen è mentì.
- III. Ma zën ke nen è ġatà,  
Sons da runfles i n pûe foša;  
L desidën m' a revinà  
Šike na vödla moša.  
Ah! mi žënt  
Če spavënt!
- IV. Son vödla i žmarida,  
Da sperè nen iel plu nia:  
Degùn plu ne me marida,  
Ma la kolpa nen iê mia.  
Mpò drë  
Da muië.
- V. Ie sè i kl ból Dië  
Tan k' e fat i è pruà;  
È segur fat l fat i mië,  
Ma nia nen a žuà.  
Da bradlè  
A pensè.
- VI. Son žita nče a dlëža,  
Ma degùn sant ne m'a žudà;  
I nfin, oh per dlëža!  
Sant Antöne m'a tralaša.  
Uleis de plu?  
Ki ës kerdu?
- VII. Son žita a gratunè,  
I trüe' bai m' a i pità.  
Ma de me maridè  
N' a mèi degùn nunzià.  
Ès pu durmi  
Bon sauri.

- VIII. A Urtižei èi fat la pròa,  
Žita sons suēnz dlaite;  
Ma degun vòdl ne me čalòa,  
Duč mučòa riēš dedite.  
Če nğanèda,  
Nče per strèda.
- IX. Ah! mutòns dal kùer tan dur,  
Ne ve binče nia de riē;  
Ma la vendètta vèn segur,  
Še n' a perdòn kel ból Diē.  
Ti čavēi  
A vo ēi!
- X. Ma xēn sè-i če ke fèže:  
Iē devēnte mo na stria;  
Pò mutòns iē ve drèže  
I ve fruze duč n nia.  
La tampòsta  
A vo ròsta.
- XI. Sibe vòdl oder žeun,  
Unjun arà si straufonga.  
Ve tóke pu mè l teun,  
Kēsta iē mi minonga.  
Taka drēt  
Kēš maladēt!
- XII. Pò kuntēnta ūei žbingè  
Kun trūep autres la gernèa,  
Kan ke ve veize vo tumè  
Granč i pitli pèa.  
Pò n čik i n saut  
Ból adaut.



## N pūek per sòrt.

»Per ki sieisa kšta iērba?« damanda n di n senjeur a n seteur;  
»per vòš patrón?«

»No« diš l auter.

»Pò la siereis per vo nstēs?«

»No.«

»Pu per ki pa pò?«

»Per la vačes.«

\* \* \*

infièrn. Dal gran spavènt m' èi dešedà. Pò èi palpà dlonga mè žu, per udei ulà ke son; i è udù ke l spavènt fè mò mažer: ke son maridà.«

\* \* \*

Saveisa kò ke anda Lena fèš per udei še bèra Žan nen a mia no bu masa kan ke l vèn tèrt òra d' ustaria? La i fèš mò mèter n fil te na odla.

\* \* \*


N avaròn fè šike n purčòl gras: l utel an mpermò dò si mòrt.



## Da ndevinè.

- I. Će ièl pa ke krèš d' invièrn i mòr d' instà?  
L a la raviza sun som i krèš žuvièr.
- II. Ki ke ne l a nia, ne ûel nia l avei;  
ki ke l a, ne ûel nia l pièrder;  
ki ke l vènč, ne l a nia plu.
- III. N l pòrta sun meiza, l mešèida i  
i n da a duč, ma deguni nen maia.
- IV. Ki fè pa l plu da čorka te dlèža?  
Ki fè pa l plu vòdl te dlèža?
- V. Kluna fè pa la masaria plu da totl  
te čèza? i kluna la plu da maladèt?





## 'L vödl mut.

(Dò na copia de W. Moroder).

- I. N-ëss' giapà bën cēnt per una,  
Ma scusà ne m' à mèi deguna;  
Mè na böna è-i zercà,  
Ma na tèla n' è-i giapà.  
Je lašëss' inánt la tèsta,  
Che me tò na tèl rie pèsta,  
Che me dà 'n tèl guiërn,  
Šiche fosse tel infiërn.
- II. Mi mutóns! èis bën la vèles,  
Cri-vè riches o de böles;  
Je per mè, je laše stè,  
Y inchèghe al maridè.  
Sálonon diš: Dut ie aitl,  
Auter che s' en böver 'n zaitl;  
In chëš cont à-l bën rešón,  
In chëš cont nen ie-l minción.
- III. Tan acòrt che chëš rē fòva,  
N' ie-l mèi stat y plu s' en tròva.  
La fenáns pur 'l à giapà,  
Èiles 'l à mò ingianà!  
Še fin Sálomon n' i mucia:  
Ve farà-les a vo na pucia?  
Mè fašë-i 'n drē mus dur,  
Še no ve giap'-les tan segúr.
- IV. Fina Ġan dala Rainöles  
Ne dà achter ala böles;  
Èl ti cigna prëst de no,  
Y stluš mò i uedli prò!

Še dišeis d' en tò de riches,  
Ve darà-l de bur gran pliches,  
Zarerà i uedli prò,  
Cignerà da nuef de no.

V. Les ve fèš tel prim la tlòza,  
Ma spitède dò la nõza,  
Audirèis tòst 'n bõl spas,  
Can che les vèn cul gran šadás.  
Še ne ti dèš bõl prèst la brèies,  
Audirès-te tòst de bieì svèies:  
Chèstes aut pu mè a mi,  
Tue! 'l chitl te dè-i a ti!

VI. Še tu nen ues, la te minciona;  
La dirà: Je son patrona,  
Ne me ciaculè debánt,  
Je cumande, tu ies fant!  
La mobilies ie dutes mías,  
Ma la criatures tées.  
Tu ies sèul a davagnè,  
Y je sès che ue majè!

VII. La dirà: 'L ie zèn la mòda,  
Che 'ŷ èuta 'ntèur la ròda!  
Caro tu! Èš intendù?  
'L šadás èš bèn udù!  
Še ne te stès bõl sot mi zòchi,  
Cul šadás arès ti còchi!  
Chèl ch' je ue, èš da fè,  
Chèl che n' ue, èš da lašè!

VIII. A San Job, diš la scritura,  
Ie - la ġita ènche dura. —  
'N se muessa spaventè,  
A pensè al' maridè. —  
Si rie fèna 'l tramentòva,  
'L minaciòva y i dašòva;  
Y per dè a 'n sant custúm,  
'L à-la trat mò sul chetúm.

IX. Še i sanč nen ie segures,  
Can che 'l va drèt ala dures,  
Ve ulèise ġmò 'nfidè,  
Mi mutóns da maridè?

Pier' o Paul, metède vèrda!  
Sul chetúm o tela mèrda  
Ve trarà-les trame-doi,  
O defín te chègadói.

X. Ès assè dinèi y mitli:  
Can che t'ès cinc, sies, söt pitli,  
Can ch' i vèn-pa dô svajàn:  
Tata, mama, je ue pan!  
Cò i darès tu assè pulènta,  
Can che t'ès na bòla gran stènta?  
O! dirès, puere cutèl!  
'L maridè ie 'l mađer mèl.

XI. Laše prò che t'ès na rica,  
Drèt supèrba che se šica;  
La dirà: Dà ca dinèi.  
Y te 'n bòt sarà-i finèi.  
Ès fiáns, drèt flinches, blòtes,  
Damanderà-les tòst la dòtes;  
Y mutóns che uel balè —  
Tè te laš-i-pa bradlè!

XII. Cri-ve pu tèl bòla Bòtes,  
Arèis tòš sul cè curnòtes;  
Cri-ve pu de vòš gust,  
Ugnuna à si fust.  
Chi 'n uel longes, chi 'n uel curtes,  
Chi 'n uel fošes, chi 'n uel burtes,  
Ma ugnún n - arà assè —  
Je per mè les laše stè.  
Èiles me dirà del dut,  
Ma je röste vödl mut.





bën, anzi 'nfina che 'l ie mòrt, 'η pò dì, dal blo' gras che 'l fòva diventà.

Can che 'l fòva mòrt, òva 'l vödl 'n vöre ferdrús y s' à 'mpessà, che 'l guardián 'l òva-pa möfun plu segúr castigà y cundanà a diventè y restè mušát tēmp de si vita.

Sta stòria ie metud' òra a pòsta per mustrè, cò che de rie gēnt per pura malizià y cun blo' baugies pròva, no mè de 'ngianè la bona gēnt, ma 'nfina-mèi de mèter 'n ridicul la virtù crestianes y la santa religiòn. Schivē-ve y temē-ve da chēi che rešona gēn di pròves, di capuzineri, dela múnighes i di cunvènč.




## Na viva pra mèisa da nòza dela mēssa nevöla de Segnēur P. Capuziner Piere Damián Verginer da Bula.

(Fata da Segnēur Batista.)

- I. Na ciantia metēs-i gēn òra  
A unēur del Segnēur Premeziánt;  
Ne sè pò, še vēgne da-in-òra,  
Zēn fēs-i na pròva d' intánt.
- II. Per vo, Segnēur Pater Verginer,  
Per vo vèl sta pue' de cianzón,  
Zēn che sēis diventà capuziner,  
Vo, nòš pitl mut da Anciòn.
- III. Ve diše mè-drē doi paròles,  
Ma drèt ala bòna y bøl brèt;  
Savēis pu ch'è fa pitla scòles,  
Y chēles mò massa da frèt.
- IV. Audíde zēn cie che ve diše,  
Y cie che è 'ncuei usservà;  
Mè-drē che vòš cuer se-la riše,  
Pò sons 'nce ie cuntentà.
- V. Ciauzèi n' èis-a drē' ala mòda,  
Pò gēis mò deschēuz 'ncantēur;  
Che še ruvessais te vèl bròda?  
Pò fosse-l 'n fòter bur lēur.

- VI. Dela bèrba ne diš-i mè nía,  
Che bèrbes à-i bèn 'ce tlo'ntèur;  
Ugnún uel valèi cula sia,  
Y mašima i gēuni can che la flèur.
- VII. Y 'l guant, che èis vo, Segnèur Piere,  
Nen ie-pa 'n guan' da segnèur;  
Je cèle 'ntèur-òra y chiere,  
Y vèighe, che duč n-à 'n mièur.
- VIII. A vòster 'ncuei na tèl fòsta,  
Pudais bèn 'mpò 'n tò 'n mièur.  
Minais-a ch'uniss' la tampòsta?  
Pu pò fais pu sot-al celèur.
- IX. Y tlo sèis pu ènche a sosta,  
Y duč à pu 'l guan' da san-dí;  
Vòš bøl sè-i bèn je cie che 'l costa:  
Na pròša š'che chèl da ugne dí.
- X. Del guant ne 'ndašèise vo nia,  
Mè 'n bøl padernòster y 'l brevier;  
'L röst dašèssaise dut via,  
Magari per 'n criegl de pier.
- XI. Doi còsses ie vòsta legrèza:  
'N gran padernòster y 'l brevier;  
Y chèsta ie vòsta richèza:  
Ma 'mpò sèis plu ric che 'n banchier.
- XII. Vo sèis zèn segúr dela salvèza,  
Y sèis vòramènter cuntènt;  
Gudèis ugne vòra belèza  
A vòster te 'n tèl bøl cunvènt.
- XIII. O bon Padre Piere, periède  
Per duč vòš amič y parèñč,  
Ch'i ruve 'n dí de-beriede  
A vòster beač y cuntèñč.
- XIV. Y vo, che sèis tlo a sta nòza,  
Gudè-v'la ugnún da crestián!  
Drusède zèn duč vòsta bòza:  
Na viva a Segnèur Piere Damián!



de san Piere ie-l 35 còrps sanč y na quantità straudinária d'otra reliquies.

Chi che vèn dunque a Roma y va a san Piere, ne 'l fèse mè per curiosità, ma per devuzión, percìe che 'l luec ie vòramenter sant, luec ulá che ch'l bōl Die per interzessión de san Piere à cunzedù y cunzōt mò truepísima grazies a chi ch' à la bōna vulentà de viver y murì da bon crestián.

Segnëur Antòne da Fussèl.

---

## L' amór del' oma.

(Da Fr. Moroder de Lenert a Urtisèi, dò na ciántia inglèisa.)

- I. Cie ie-l che sun cheš mont lieia 'l cuer  
'L plu santamēter, del ric y del puer',  
Che bōle al našer cun gaudio nes saluda,  
Che dura fin che la mòrt nes spartēs y dut muda?  
'L miëur sun cheš mont, che dal ciel nes pò unì dat,  
La maġra bendešión ch' Idie nes à fat,  
'L plu amabil, 'l plu vëira, 'l plu che dura:  
'L ie l'amór del'oma y si cura.
- II. Tan de mèi bōl dan nōš našer, y pò ce bria  
Pra la cuna, dí y nuet ne laše-la dò nia,  
Ce lëur a nes cuntentè, ce tēma, ce cura,  
Dut supòrt-la cun paziēza zēnza mesura.  
La riš cun nēus, y a cuer i va duč nōš mèi,  
Y ce festide, ce duel, can che son amalèi.  
Mèi n' à-la fat assè y pra nēus sta-la for,  
Mèi ne se stancia del'oma 'l gran amór.
- III. Y pò che son plu granč y cheršui sù,  
Che 'l mont minacia nōsta giuventú,  
Ši che la se prōva cun bon 'nsegnamēnč,  
Che restonze da lonč dal mèl y bieì valēnč.  
Tel pericul nōsta miëur custòdia sarà  
Ch'la paròles d'amunizión y d'aurità,  
Che dut a bōnes y tan de cuer rešona  
Plēn de tēma l'amór de na bōn' oma.
- IV. Y can che cui ani 'ncie per nēus vèn 'l tēmp,  
Che se 'nġignón cumpanía y tēl pitla ġēnt,  
Che tan nes sta a cuer, y ch' i ulón tan bon,  
Mè per nōsta familia nēus se festidión,  
Ugnún a sè pēnsa y per i siei cialerà,  
Del fra, dela sòr, del amíc l'amór passerà;  
Ma še duč t'èss' desmincià y t'èss' tralašà:  
No mèi, mèi l'amór del' oma ne sarà finà.

De cundana òv-i giatà 20 ani per-un, auter che Bovo; chël òva giatà 15 ani, pervia che 'l nen òva fa nia a gënt y òva cun-fessà ite dut.

A. L.



## Per la fösta del 1908 a Urtisèi.

- I. Ve saludón cun duta stima,  
Mont de Frèa y Gherdenacia,  
Vo de Sëlva y sant' Crestina,  
Dut Surèghes cun Puciacia,  
Vo Badiòc y Ampezáns,  
Mò Fedomes y Fašáns,  
Bèn unič duč a un,  
Per la fösta del chemún.
- II. Vo Ladíns sèis duč 'nvièi  
Per sta fösta a gūdè;  
Pitl y grant, tan èiles ch'èi,  
Da nòš chemún a saludè  
Y ringraziè del gran unèur,  
Cura y bria, che s'à dat  
Nòš Grof amà y bon Segnèur,  
Che sèulamènter chēs à fat.
- III. La natura dut plu bōla:  
Dut se-la gēut, bèn grant y pitl;  
Tan plu tlèr ie mont de Sōla;  
'Nce l'ava à n'auter chitl.  
Dut se-la riš dala legrèza,  
Sauta y ciga; china i pēs  
Te ruf cun gran svaltèza  
Spriza 'ntèur y se devertēs.
- IV. N'ulēs<sup>s'</sup> di nia dela mutáns,  
Di mutóns, 'nce del'oma,  
Dut deslià, 'nchina i cians  
Sauta 'ntèur s'che mač y toma.  
'L plu da ri ie mò Sas-plaç,  
Sas-lonc ne sta plu nia chiet;  
Chi crèps sta ca s'che cater mač:  
Pudēs<sup>s'</sup> minè che 'l ie 'n sueñ te liet.
- V. Dut sauta adúm a decurè  
Cèses, plazes, a fè purtóns  
Cun nēif, stanges, y a purtè  
Daša, 'nce tèi pitli mutóns.

I vödli ambòlč: Chël da Snetón,  
Da Còsta, Murèda y 'l Cadèmia,  
'L Pöc, 'l Purger, chël da Janón,  
Fač de nēif meríta prèmia.

VI. 'L ie dò-mež-dí, zēn prēs la doi,  
'L Grof muess' ruè bēn ugne mumēnt;  
Ġēnt ie-l bōl dlonc sun ugne troi,  
La muš'ga sauta che'l ie 'n spavēnt.  
'L ambòlt saluda 'l prim de duč,  
Pò chēi de scòla: Segnēur Pluán,  
Šizri, dutores, y Segnēur Puč:  
A dui ti dà Segnēur Grof la man.

VII. Cun gherlanda spiza sie<sup>s</sup> mutáns,  
Fòve-l a reciöver nòš Segnēur,  
Ne se diš tan bōles, semiòda fiáns  
De 'n còser, no d'usèdes al lēur.  
Ch'la Milia à dit tan bōl y a drēt  
Chel rim che bèra Franzl à fat;  
Je m'è 'namurà, — Die benedēt  
Ġude-me, še no devēnt-i mat.

VIII. Val de Gherdèina, mi legrēza,  
Data de fertuna trēs y trēs;  
Dut stupēš per ti belēza,  
Tèi bieì crēps y monč che t'ès.  
Rōsta š'che t'ies per for y for,  
'N pòpul 'mpulsà de spirt y vivanda,  
De cunfidēnza a Die y amór  
Al lēur; 'l ciel te dará la gherlanda.

Cristl Delago.



## La Madòna à da-gnēura ġudà.

(Da Segnēur Pluán Anderlan.)

La vödla dlieša da Urtišēi ne fòva zacán ulá che la ie al dí da 'ncuei; la fòva sa sant' Ana, ulá che ie zēn la curtina, y fòva 84 pieš longia cula curtina 'ntēur ite, cò che 'η vēiġa mò te truep lueš. Dlongia fòva la capòla de sant' Ana, cò che la sta mò al dí da 'ncuei; y che, a chēi tēmps se tlamòva la capòla dai òš. La dlieša iló fòva stata frabichèda l' añ 1744, ma i òva fat la murèdes massa dēibles, a maniera che les zessòva; 'l revēut tragòva de gran sfèsses cun gran pericul de tumè ite, y la dlieša scumen-ciòva a se sfēnder. Per chël à pò chēi da Urtišēi frabicà la gran

## Sentēnzes.

A sunè adròv-uη strumēnč;  
A ciantè muess-uη vōster cuntēnč;  
A uginè muess-uη vōster bieì valēnč;  
A 'mparè muess-uη vōster drēt diligēnč;  
A n' aršumè muess-uη vōster for atēnč;  
A studiè mand-uη per 'l sòlit studēnč;  
A se dessenè devēnt-uη revēnč;  
A se puznè devēnt-uη ruḡēnč;  
A bōver devēnt-uη 'm pue' rušnēnč;  
Še 'l ie puecia lērc, se fēs-uη strēnč;  
Še vèlc dura massa giut, devēnt-uη busiēnč;  
'N tira plu saurì še valguni spēnč;  
I ueves da Pasca 'nḡign-uη 'ntēnč;  
La fōrbes adròva chēi che depēnč;  
Chēi che se pèra, ie chēi che vēnč;  
Ded-òra da Būlzán diš-uη a Rēnč;  
'L ḡiēut y i rati ie šòrfes y rassēnč;  
Ulá che 'l ie viēra, ie-l da-gnēura spavēnč;  
De rōgula plura mè-drē i parēnč;  
'N grum de pensieres, 'n grum de mumēnč;  
A 'n fè passa mile, 'n uele-l dai cēnč.

Segnēur Batista.



## 'N puec per sòrt.

**Pitla defrēnzia.** 'N dí passòva 'n tēl zarlatán de 'n snòps-prueder dan 'l paláz de 'n gran segnēur via. 'L guant òve-l plu tōš blot da pientles che da zandli — pò vōster, davia che fòva n'èl y no n'èila. — òra de na fuja dela ḡòca dut tacunèda cucòva òra na bōza, še bēn che 'l ne fòva-pa un de chi slabòcs che va cun bòzes 'ncantēur. Can che 'l ie revà sot-al purtón del paláz, i à-l dà sú na tēl cērta udlēda, pò s'à-l autà ḡu-vier y à dit tra sè 'nstēs: »I fēs 'n tēl fè de cheš gran ricón ca-sú, a mí me pèr che sibe pitla defrēnzia tra mè y èl: èl à-pa mōfun scumencià zēn 'l segundo milión, y je scumēnce 'l prim.« S. Batista.

**Un plu maladēt del auter.** Cristl y Franzl s'udiòva a mòrt da 'm pòz 'nca bōle. Ma ne va via giut, che dui doi vèn žarèi ite: Cristl òva rubà n'ēura, y Franzl na vacia. 'N dí s'ancont-i te persón, can che i ḡiva dui doi sul gòng a spaz. Š' i ne foss' stai te persón 'n chēl mumēt, ēssa ugnún purvà d'i dè na scurtlèda

Can che 'l fòva da pajē — 'l òva da pajē 7 fiēres y 'l léur —  
i dà-l al fèver 2 tòleri da 3 raineš. Zēn à chēš scumencià a i cialè  
a chiš tòleri, 'n tòl ca un dò l'auter y i romp a mōz gū. »Chiš  
ne vèl ēnche no nia« diše-l al grof. Zēn à-l messù la cunzōder,  
'l grof, che 'l n-à giatà un da plu fōrza, y i à dat 'n luiš-d'òr.

A. L.

\* \* \*

Anda Lèna y bèra Piere ie inò unii a se di 'm pue'. A de  
tèles muesse-l fōter for ēl dè dò. »Cò che la ie,« diše-l, can che  
'l ne sà pu cie di zēna, »dan maridè t'ulòv-i tan bon, che t'esse  
bōl majà, y zēn me mueia, che ne t'è majà.«

A. L.



## Pensieres.

Die me-l perdone,  
Še diš' cò che me sà;  
Die me bastone,  
Še chēl ie falà.

C. D.

\* \* \*

Chi che mēt vèrda, cie che d'autri fēš,  
S'aršuma 'nstēs y se revina la peš.

C. D.

\* \* \*

Can ch'un miena, che 'l sà assè,  
Ne sà-l plu nia, cie che 'l sà;  
Can che 'l à pò vèlc da fè,  
Prēs dò vēighe-l, che 'l à falà.

C. D.

\* \* \*

'N ambòlt che se vēic mè sè y si parēč,  
Fēš tan che 'n ciavál, che ne tira še 'η spēč.

C. D.

\* \* \*

'N ciavál viēč pòss-uη menè;  
'N chemún che n' uel udēi, ne se laša catrè.

C. D.

\* \* \*

La bõna bales n' a-η drē d' autè,  
La bõna fanciõles no drē de cumandè.

C. D.

\* \* \*

Chi che uel avèi si ròba cò che 'l dēs,  
Muessa fè fant y fanciõla 'nstēs.

A. L.

\* \* \*

Še la 'nvidia vardēssa š'che fuec,  
Custēssa la lēgna puec.

A. L.

\* \* \*

Oswald de Wolkenstein diš:  
Plu gran amór ch'i purtēis ala bõl 'ēiles:  
Plu gran mucies ve farà-les ēiles.

A. L.

\* \* \*

Cul amór passa 'l tēmp,  
Y cul tēmp passa 'l amór.

A. L.

\* \* \*

Še doi ēiles ie únfat bõles, ue-i bon a trame-doves,  
Vēn-pa bēn 'l tēmp, chē te stufes de duta-doves.

A. L.

\* \* \*

A durmì vèd-i je for cun tēma:  
Adam à giatà, 'ntan che 'l durmiva, na fēna. A. L.

\* \* \*

La mutáns de vint ani damanda, cò ch'ēl ie;  
Chēles de trēnta, cie che 'l ie,  
Chēles de caranta, ulá che 'l ie.

A. L.

\* \* \*

'L tēmp cunēs-uη al vēnt;  
'L père a si pitl inuzēnt;  
'L patrón al dò ch'ie si gēnt.

A. L.

\* \* \*



'N inglëiš, šaldi ric, a fa scri sul sas de si fòssa:  
Chël ch'è spendù, è-i abù,  
Chël ch'è dat via, ie inò unì zerúc,  
Y chël ch'è anzà, muess-i piërder.

Fr. M.

\* \* \*

Degún n'ie plu puere che 'l ric, che ie mè ric. Fr M.

\* \* \*

Chi a biešes, à pòves,  
Chi à mutóns, à nevòles.



## Da 'ndevinè.

### I.

Te chiš nuef pitli chèdri ie-l da scri  
ite i zifri: 1, 2, 3, 4, 5, 6, 7, 8, 9, de  
maniera che 'l monta òra t'ugni lingia  
15, a cumpedè:

I. via y ca;

II. sú y ġú;

III. a piz a ciantón.

In obige 9 Quadrate sind die Ziffern  
1—9 so einzusetzen, daß die Summe  
jeder Reihe:

1. von links nach rechts,
2. von oben nach unten,
3. diagonal gezählt


15 ergibt.

A. L.

### II.

'N segnëur damanda 'n tël pitl badiòt, che vèrda l'auces,  
tantes che 'l n-à. 'L pitl respuent:

»Še ěsse chēstes, y mò tantes, y mò mōža tantes y mò 'n  
chèrt de tantes, y vo fussais l'aucón, pò n-ěss-i iust 100.« Tantes  
n-òve-l -pa?

A. L.

'nši ie-l catacombes, che à gor cin partimēnč. 'N pò se 'nma-  
ginè, tan sot che 'η muessa ġi te tiēra per revè al partimēt ġa-pō.

La catacombes dunque ie luēš da respetè y da venerè, percie  
che iló ie-l la tombes o fòsses de truep mìle Martiri y Sanč, che  
à cunfessà la medōma fōde crestiana che nēus cunfessón y che  
ulón dò si ešēmpio fedelmēter cunfessè fin ala mòrt.

Segnēur Antòne da Fussèll.

---

## Na ciántia per 'l Primiziánt.

Ie ve salute, bon Segnēur Primiziánt!  
Chēs ie per nēus 'n gran dí sant,  
Na gran legrēza ie-l per duč, 'nce per mè,  
Chesta gherlanda je pudēi ve prešentè.

Vo fais ēnche 'n tēl pitl mut,  
Y zēn sēis chēl che vèl 'l plu de dut.  
Sēis chēl che fēs 'mpō de Die;  
Gešú à dit: »'L ie šiche fosse je.«

Na sēul paròla 'l fēs unì sun nōš autère.  
Tan ubedient šiche n' jēde a si pèrè;  
Da iló pò, — bōna ġēnt, pensēde —,  
Te mi pitl cuer chēs 'l prim jēde.

Pò tanč 'ncuei y da-mo-in-la  
Chesta grazia per vōsta mans giatrà,  
Y 'l perdón de si picēi a trueps sarà dat,  
Ah, cie gran cōssa che Idie de Vo à fat!

'L bon Segnēur per chēs sibe laudà y rengrazià,  
Vo drēt de cuer da nēus congratulà,  
La santa benedešión prions per dui canč,  
Aciò che Vo y nēus unións 'n di sanč.

Segnēur Ušōp.

---

## La cuces da Nadèl.

'L fòva n' jēde 'n gran segnēur, che ie ġit na sēira te 'n  
teater de zità y à udù iló na ciantarina, ch' i plašōva termēt.

L' auter dí va-l, bōl da macarón, zēnza se pessè ġiut, de-  
bòta y compra dodeš cuces 'ndurèdes, les ġēura su dutes, mēt ite

cuces cun zechíns y dut. N' auter jêde cialerè-i de fè del bèn,  
ulà che 'l toca. Son cuntènt, che la ie tumèda òra 'nši.»

Sèpl da Passua.

## La fertuna.

Fertuna ie 'n uciöl  
Pià y žarà te gábia;  
Legrèza mostr-el revöl,  
Ma 'nce tristèza y rábia.

'N muessa vöster atènt,  
Acìò che 'l ne s' en vède,  
Percie sarà rie termènt  
A 'l piè 'n segundo jêde.

T. P.

## La zintling.

La zintling! audièis-a sunàn  
La ciampana, bøl plan: bin ban?  
Tan plan che la sona, tan plan,  
La ciampana, l' audièis-a sunàn?

La pitla, ciuldí che 'ŋ sona,  
I no la granda bøl plan,  
Damanda 'l pitl al' oma,  
Spaurì, bõlau bradlàn.

I uedli 'n gota, l' oma  
Respuent a si pitl fi:  
»Percie, — percie ch' i sona?  
Ne pòsse, — ne pòsse te-l di.»

'L père, per èl sunòva  
La pitla ciampana, tan plan,  
Per èl chest' oma bradlòva  
A messèi l' audi sunàn.

La zintling! audièis-a sunàn  
La ciampana, bøl plan: bin ban?  
Tan plan che la sona, tan plan,  
La ciampana, l' audièis-a sunàn?

T. P.

## La val de Gherdëina.

Gherdëina, bôla valèda,  
Gherdëina, bôl rusnè,  
Gherdëina, bôla Gherdëina,  
T' ame plu che mè.

Saslónç y Pič y Cuca,  
Da Bula 'nfin Mastlè,  
Da Plan 'nfin a Pruca:  
Cialè s' en pò-η assè.

Tèi crèps y prèi y monč  
Ne vèig-urη segúr inió;  
Sul mont no lèrc no lonč  
Ne ie-l plu bôl che tlo.

Gherdëina, t' ies furtnèda;  
Unëur a chi pò dì:  
Gherdëina, bôla valèda,  
Cie bôl a vöster ti fi.

T. P.

---

## La rie fëna.

O tu puere, puere mat,  
Tu totl, cie ès tu mèi fat,  
A maridè na tël rie pesta,  
Che te ciavatöa drèt la cresta.

Dan maridè i fòva dut bôl y drèt,  
Ma la òva ite 'l maladèt:  
'Ntan che la se stilòva drèt valènta,  
Sul cè te fašov-la suènz la pulènta.

Dì mè vèlc zën! pò ies 'n mušát,  
'N totl, 'n ciavón o gor 'n mat;  
Èila à dagnëura sëula reğón,  
Tu ies mè for 'n puere macarón.

Siche na vöra tanaja Mariëursa,  
Èila sëula tën y mëina la bëursa,  
Y še tu ues datrai 'n da-söt,  
Te respuenderà-la snöl: slöc, slöc!

Per zandli, pintes y per se śichè  
A-l' èila dagnëura gròs assè.  
Ma še tu adròves 'n cē de guant,  
Pëtla mè tu! 'l ie-pa de-bánt!

O te ies bën 'n puere scafaròt!  
Ulësses datrai t' en böver 'n gòt,  
O fè vèl jēde 'n pitl ġuec:  
Pruibì, pruibì! spieta 'm puec!

Suēnz de nuet, per avēi si böla ghenèda,  
Se stiel-ela finèda o gor amalèda,  
Y pò muesses mōfun tu levè su,  
Y pösses tu chi pitli sujē ġu.

Craugnē, svajē y petè gor,  
O, chël te fēs-ela bōl for.  
'L ie 'n spavēnt, per dieša stēila,  
A messēi avēi na tēl rie èila!

Je ue bën giēn i bincè 'l paravís,  
Ma mè-drē' 'm pue' prēs, še mèi che la ġis,  
Percie 'η ne la tēn prōpi no òra,  
Pra na tēl èila va-η bōl 'n malora.

Franz Moroder.

\*\*\*\*\*

## Mi ciasòta.

'L fòva na pitla ciasòta, a la bōna, de lēn,  
Ma la fòva mia, y blòta, y da stē giēn;  
La róndules, muntres böle da dumán,  
Šulòva ite y òra se-la ciantàn.

Tela chēurt òv-i 'n dròc cun si funtana,  
Cun èga bōna frēša y sana;  
Y dan cēsa fòv-el 'n tēl pitl verzón  
Cun ciblóns y salata de cheršón.

Dò cēsa, te si pitla stala, mi zieba, la cēura,  
La gialines y 'n gial che cherdòva bōl a-benëura.  
Te stua, sun balcón, la gábia cul uciöl  
Y mi bon Pimperle sun ban da furnöl.

Chěš fòva dut mi pitl avěi,  
Che giut cuntěnt è-i pedù me gjauděi;  
Ma lauràn y sparagnàn šiche 'n bon fant  
L' è-i meněda pròpi šaldi inánt.

Pò can che la fertuna m' a fa ric  
Y di granč 'l cumpagni y amíc,  
Mi pitla ciasòta ne m' à plu scusà,  
Y per puec a fulestieres l' è-i data ca.

Žěn è-i na cěsa pròpi da gran segněur,  
'Nğegněda ite dò 'l plu bōl y 'l miěur,  
Y cun duta la comoditějes le-prò,  
Y pedientri che me servěš dant y dò.

Žěn ěss-i běn dut 'l bōl y tan 'l muet,  
Ma mi cuer se sěnt 'mpò puere y uet;  
Mi pitla cěsa, ulá ch' è passà alōgra giuventú,  
O, chěl ne ie mi bōl y gran paláz měi, no, no, měi plu.

Truep gròš y truep avěi, ne 'l cherděis,  
Dà gran festiděš, ie suěnz de pěis;  
La pěš del cuer y la vōra cuntentěza  
Dà mè 'l fě del běn, ma no la gran richěza. F. M.

---

## Ěnche 'n festide.

(De na vōdla muta da orden.)

Puera Mariěusa ie ġu a liet,  
Ala mòrt pěns-ela suěnz bōl a chiet;  
Ma a murì ne ie-la-pa nia grama:  
Cie ulěis-a? la ie tan na bōn' ana.

Ma 'n festide à-la 'mpò te si ũltimi dís:  
Cò cialerà-la měi òra la-sú sun paravis?  
Sarà-l-pa běn dut al orden y drět;  
Dut te si luegia, rumà su y nět?

Chi bieci troni ne sarà mia no da taces?  
I firōnghes y i tepichs fōrši da maces?  
La snòles, la lampes, i viereš běn puzeněi?  
La měises, i banč y i fonč běn lavěi?

Y chi pitli ángiuli, cun si tripè,  
 Ne desmencerà mia, cie ch' i èss' da fè?  
 Sà-η bèn! cul nòte de sauté 'ncantèur  
 Desmencerà-i bèn datrai de fè si lèur!

Y 'l bon san Piere dala gran tlèves,  
 La bërba 'm pue' da tabác y da sbèvies,  
 Lašerà bèn mè ite l' anes pies  
 Y no fòrši 'nce vèl lotri o stries?

In Gottsnomen, ue bèn gièn muri,  
 Pò can che ruve sun paravís 'n dí,  
 Pò ue-i-pa bèn drèt me purvè,  
 Ulá che 'l fos bušèn de cumedè.

Pò ue-i-pa bèn de dut m' en curè,  
 Mè-drè' che 'l bon Die me laše fè,  
 Percie orden dē-l vòster dlone, y cis  
 La-sú te chel bøl gran paravís.

Franz Moroder.

## La benedešión de mi père.

Ġnudlà pra liet del père stašòv-i bradlàn,  
 Y èl zitràn sul cē m' à-l metù la man:  
 «Che chel bel Die te benedēše, o mi fi, mi fi!»  
 Chēsta paròles, dut da dēibel, ma tan de cuer m' à-l di.

Pò ie-l mòrt, y no gròs no ròba n' à-l lašà;  
 Ma cialēde, pur empò si èrp je son sta;  
 Percie na gran fertuna, la mièur arpeġòn  
 Je stata per mè si santa benedešión.

Y pra duta mi fadiēs y mi lèur  
 Per me vadagnē 'l viver cun unèur  
 Me cunfòrta mò for 'n tēl pensier: de senti  
 Sun mi cē la man del père che m' à benedi.

Dò 'nlèuta tan de tēmp che 'l ie bōle passà,  
 Y tēi pitli «Père, père» suēnz m' à cherdà;  
 Ma for can che me lecòrde de 'n chēl dí,  
 Me sēnt-i 'nce je de 'n bon père 'l pitl fi.

Franz Moroder.

»Zèn va mè, me pens-i, še no Bōta sta cun festide.« Son mò cherdà pra 'l cramer y m' è fat dè per trèi lire,<sup>95)</sup> doi drairi y 'n laichter<sup>96)</sup> 'n puchl, 'n miuel<sup>97)</sup> de uele, 'm pue' de stupín dala lum, 'n maz de suplríns y 'n prisl per la fèna, y chēs ie stat bèn fat, che 'mpō de giapè la šopa y na bōna remanzina,<sup>98)</sup> šiche l' aspitōve, can che l' à udù 'l prisl, n' à-la dit patōla,<sup>99)</sup> y prēs m' à-la purtà su 'n bon crōsul, miēur ch' i gran ojes<sup>100)</sup> n' en à, y je me 'l è šuflà<sup>101)</sup> ite cul apētīt da jagher, y pō m' è-i petà via sun ban da furnōl, me l' è impizèda<sup>102)</sup> y se l' on cuntèda biei pacifici y cuntēnc mò giut ala longia, 'nfin che 'l fōva scurēnta nuet.

Zèn v' en è-i bèn ciaculà su assè; la vōdla parōles, che ne vèn puec o nia plū adurvèdes, ve spiegh-i tlo per tudēsc; metē-les inò 'n drōva, y n' auter añ v' en dirè-i inò truepes d' autres, che è crit su y che m' è nutà su. Zèn bōna nuet a duč!

Franz Moroder.

## 'N salút.

(Per nōš Segn. Pluván Franz Anderlan al ucašión dela fōsta, che la cheimún d' Urtišēi i a fat per i dè 'l diplom de Ehrenbürger y liet dant sul bast di 18 d' Agóst 1912 da Franz Moroder de Lenért.)

Cialēde tanč che 'ncuei s' à abinà 'ntēur  
A nōš Segnēur Pluván per i fè drēt unēur,  
'N unēur che 'l s' à tan bèn merità  
Dò vint aņi de cura y dut chēl che 'l à fa.

Perdona, še 'ncuei je te dè del tu;  
Crē-me, chēs vèn de cuer mò tan plu,  
'L ne ie per mèla crianza,  
Sēs bèn, nēus poēč on chesta usanza.

Bōle da gēun nōš cumpagn' ies-te stat,  
Pò ti studi cun flais ès-te fat,  
Pò cun gran zèlo ies-te stat nōš caplán,  
Pò nōš curát y zèn d' Urtišēi 'l prim pluván.

Tu dirès: »M' eis fat for mè bōl sul mus,  
Ma dò 'l spinèl truepa muejes y ferdrús«;  
Son danz puera gēnt, perdone-nes mōfun  
A mi, a Tōne, a Sèpl y a Stōfun.

<sup>95)</sup> Pfund = 12 alte Kreuzer; <sup>96)</sup> = 4 Pfennige; <sup>97)</sup> ungefähr  $\frac{3}{10}$  Liter; <sup>98)</sup> gelinde Predigt; <sup>99)</sup> nicht das Mindeste; <sup>100)</sup> große Herren; <sup>101)</sup> schlürfen; <sup>102)</sup> anzünden ('mpīda).



Tu t'ès 'neurà de nõš bèn spirituel  
Y suvènz 'nce per tanč del bèn materièl:  
Tan de puereš y descunsulèi che t'ès ġudà,  
Y de manteni la pèš t'ès dagnëura purvà.

La curtina y la dlieša èš ġudà a 'ngrandì,  
Aciò che stašóns 'n vita y dò mòrt plu sauri,  
Per la scòles y tan d'otra còsses truep èš fa  
Da vint aņi y plu, per nõš bèn èš for laurà.

Cun tan de dutrines, perdiches, 'nsegnamènc  
Che Tu t'ès purvà, che restóns bieci valènc.  
Ma tan suènz ti amunizións à puec ġuà,  
Y cò t'arà-la-pa pò tel cuer mujà!

Ma ch'l bøl Die tèn-pa de dut cont  
Y paja-pa autramènter che cheš mont,  
Y dò la fadiés y 'l lëur de chiš puec dís  
De prèmio te don-el-pa 'l bøl paravis.

Ma no mò prèš, mò ġiut muesses stè  
Pra nëus y purvè de nes custemè;  
Ulessán 'nce nëus la-sú te fè cumpagnía,  
Še bèn che nõš merit sarà pitl o nia.

Y je è mò na gauša de me ralegrè,  
Per chël è-i 'nce purvà tan bøl de ciantè,  
Percie je è fat gor 'n bøl vadagni  
A ġiapè 'ncuei 'n tël bon cumpagni.

Žèn èss-i-pa mi pitla ciantia bèn finà,  
Mè-drè che la v'èš' scusà y no stufà,  
Pò ue-i-pa bèn inò na uròla bøl chiet scutè,  
Percie 'l ie-pa bèn 'n taicher per gherdëina a dichtenè.

---

## La grandëzes del mont.

Cula paròla »mont« 'ntendóns 'l ciel y la tiëra; al ciel i di-  
šóns 'nce 'l firmamènt y ala tiëra 'ncè 'l mont. Dut adúm ie danz  
zòche de grant òra de mesura, zòche tan de grant, che nõš fer-  
stònt n'ie nianca bon de se fè na drèta idèa no de vèl tan de grant.

Sul ciel ie-l na infinità de stëiles, ugnuna tan granda, che  
degún ne se pò fè na idèa, y che 'l pèr na còssa che ne pòsse  
vòster, ma 'l ie 'mpò vëira. Danter duta cantes chesta stëiles

# L' oma, ch' à metù sot ala gialines 'n dí del Avënt.

1. 'N dí del Avënt,  
Dal mađer vënt,  
Devënt-el te cësa  
'N gran spavënt.
2. Da castl da spëisa  
Via pra mëisa  
L'oma desprëda  
Dut che bëisa.
3. 'N bon pastulà  
'Ncuel vën fa,  
Tamešóns y èga  
Bën mešedà.
4. 'Mpöa la lum  
Dut al-infúm  
Per corer te stalla  
A udëi 'l grum.
5. Pò-η se 'mpensè,  
Ce nòt' y ce fè, —  
Dut te fuec  
Sarà ġit 'l cafè.
6. Mutóns y mutáns,  
Giac y cians  
S'abina dan stala  
Y sauta y bala.
7. L' oma su l' ëura  
Va y gëura  
Per udëi la gialina  
Cie che l' à fa da ch' st ëura.
8. Ce dlacià,  
Ce splumà!  
'N punšin  
T'lo bøl cherpà!
9. Gialines desprèdes,  
Mözës dlacèdes;  
L'oma scumëncia  
A trè de gran brèdles.
10. »Tan bōlin,  
Puere punšin!  
Fòve per te vënder  
D'instà a 'n patin.
11. Y zën per ch' st añ,  
Che vën, ce dañ!  
Te stua te pòrt-i  
Su bøl plan.«
12. Metù bën blòt  
Te 'n bøl scafaròt,  
Medesina le-prò,  
Getèda te 'n gòt.
13. 'L òva 'l brušëur  
Y 'n rie culëur,  
Per chël 'l à l'oma  
Metù sun fëur.
14. Dut al-infúm  
Te furnöl al-ingrúm  
Vencëies mò vërč,  
Che fës 'n drë' fum.
15. Furnöl revënt  
Che 'l ie 'n spavënt.  
'L punšin che dlëiga  
A ugni mumënt!
16. 'N 'l aut desdlaciàn  
Y le-prò crazàn,  
Böl' ugni-tan'  
'N pue' šiblàn.
17. Cun na šadón  
Bën smauz, del bon,  
Ti vegn-ël dat ite,  
Che 'l vegnë inò 'nton.
18. Bøl 'mpont  
Cun chel drë' bon ont  
'L à-la, ma fat  
Unì al mont.

19. Inò te stala  
Purtà zēn 'l à-la,  
Dat da magē;  
Y pò s'en va-la.
20. Inò desfertuna  
Je-l unìt una  
Al puere punšin,  
Che nen òva mò pluma.
21. Dlongia 'n pèl  
Da 'n pò de 'n vadöl  
Je-l unì sfrant  
'N dí de Nadèl.
22. Tel lèur de stridlè —  
Y 'l gial a ciantè —  
L'oma a 'l udèi  
Muessa bradlè.

Leo Runggaldier.

---

## 'L bambín da Nadèl.

Na pitla muta ulòva mèter na lètra te na scátula dala pòsta, ma la n' argungòva nia su. Te chèla passa 'n segnèur, ti dà na udlèda a chesta pitla, pò lieg-el l'atrès y mèt la lètra te scátula. Su la cupèrta stašov-el: »A chel bøl pitl bambín da Nadèl sun Paravis.«

'L segnèur va te scritòrio dela pòsta y se fèš lieger la lètra.  
'L fòva scrit:

Bon bambín da Nadèl!

'N aut dišàn, che te pòrtes datrai tøl bòla ròbes a chi pitli; davia de chël te prö-i-pa bøl, ne nes desminciè-pa nēus, pò ies-a drèt valènt. Te sès bēn, l'oma ie for tan amalèda, mi frèdeš ie mò tan pitli, pò ons tan la stēnta: puec y nia da majē, deguna lēgna da šaudè ite, zēn che 'l ie tan frēit. Te sès bēn ulá che stašov, òra 'nsom la cuntrèda dela pecúnia.

Valdalafám, 24. XII.

'L segnèur damanda dò y 'nrieš, che 'l ie pròpi na puera familia. Y da sēira à-l fa purtè da si fanč de drē cestóns de lēgna, de farina y de ròba da majē a chesta familia.

No mè la familia à abù de bōna fōstes. 'nce 'l segnèur fōva cuntènt d'avèi pedù fè tan na bòn' òpra. S. da Passua.

---

Mèine ie pra i saudèies. 'N dí te scòla vègn-el damandà, ciuldì ch'i saudèies d'un regimènt à butóns ghièi y i autri butóns blanč. »Aciò ch'i pòsse se ciulè 'l curpòt« diš-el bōl da maladèt.

\* \* \*

'N segnèur ruva 'n dí sun pastura pra la biešes. N' jède rešon-el cul dišè; pò va-l dal pàster y mèt man de ciaculè cun chël. »Vòš dišè à dit, che la biešes fošes maja adōs mò 'n tant che la blances; ie-pa chël vèira?« »Òhò,« diš 'l paster. »Še cò ie-pa chèla?« »Pu de fošes n ie-l adōs mò n tantes che de blances.«

\* \* \*

Ch'sta cèsa ie mia y 'mpò no mia;  
Per 'l segundo n' ie-la ènche nò da nia,  
'L tèrzo ne starà ènche no for tlo,  
Per 'l quarto ne sarà-la ènche no,  
'L quinto unirà ènche purtà via.  
Die! chi pudrà di: »Ch'sta cèsa ie mia?«

(Sula cèsa Villa Runggaldier a Urtišèi.)

## Pensieres.

Fos bèn drèt di vèlc datrai,  
Še 'ŋ ne falèssa for la šipa;  
Gèures la musa, diš-i: Ches bagai  
Muessa for menè la snipa.

C. D.

For pensè, ne di mèi nia  
Je melsàn per ana y còrp;  
Rusnè drèt truep y pensè nia  
Ne farà segúr degún acòrt.

C. D.

Anes supèrbes è-i je gièn:  
Sú-vier supèrbes, gú-vier da bèn,  
Laudè les muessa mi rim. —

La-sú se cufè,  
La-gú strandlè:

— Na crèuš d'òr pò-les avèi per mè —  
Tèl anes ne sons je bon de laudè.

C. D.

Vèl gènt ie 'ntòrta,  
Vèlc ie mèl trata,  
Puccia d'acòrta  
Y tanta de mata.

C. D.

## Da 'n devinè.

Ah, stoma chi ch' i son:  
 Crèie, èrt nen à-i degún:  
 Mo, orös-te tò retrát  
 Avisà a tè anfát,  
 I' te-l fège zègn sul momènt,  
 Ch' èl te somèie bøl dut cant.  
 Degún moler 'l òs te n' an,  
 E ju te-l fège snöl de-bán;  
 Mo te mësses stè pro mè,  
 Še te-l os, mai te-l da-i con tè. Prof. Alton. \*)

### Soluzión de chël da 'n devinè tel calènder dal añ passà:

I.		
2	7	6
9	5	1
4	3	8

II.

36.

IV.

Deguni, i autri s' en mucia.

III. J à la I. bòza da 8 litri plèina,  
 la II. bòza da 3 litri ueta,  
 la III. bòza da 5 litri ueta.

I 'n mèt: dala I. 3 l tela II. y da chëla tela III.;  
 rōsta 5 — 3.

pò dala I. 3 l tela II. y da chëla 2 tela III.;  
 rōsta 2 1 5;


pò dala III. 5 l tela I., dala II. 1 l tela III.

rōsta tela I. 7 l II. 0 III. 1 l.

pò dala I. 3 l tela II. y da chëla tela III.;

pò n-ie-l: I. 4 l, II. 0. III. 4 l.

\*) Ora de „Rimes Ladinces“. Disprue, Wagner 1885.



## Ladins,

Messón tenì adum,  
La fòrza vèn dal grum.

### 'N salut al calënder.

Te salude, blòt pitl calënder di Ladins,  
Scrit per chëi de Gherdëina y si uġins!  
Še bënche mò ġëun, de cater aņi permò zën,  
'Mpò truepes t' aspjeta y te lieč vöre ġiën.

Še bënche de scrittura no mò drë franc,  
Ai Ladins i ies-te drët enteressant,  
Y ěi se ġòt a pudëi lieġer si rusnëda,  
La rusnëda del' oma, dad ěi tan stimëda.

Ši, te salude mò n' jëde de cuer, tan plu,  
Percie tu nes ès permò drët dešedà su.  
Zën i onse dat 'n ġuant a nòsta rusnëda,  
Še bënche vëlc minòva che la fos tòš finëda.

O no despezëde nòsta rusnëda, stimë-la  
De cuer, teni-la al aut y bën cultivë-la!  
La ie y nes sarà for de gran benedešión,  
Percie mè cun chësta mategneronse nòsta naziòn.

Franz Moroder.



Kun kesta paroles dedikeja Mistral si liber imortel »Mirèio«  
a n amik. »Te sporc n paura. De vester n paur, fova per  
Mistral si mashtra fertuna, kuntentèza i superbia.

Ufhepantone Comploj.



## Adio Gherdëina!

O bela val, mi bel' Gherdëina!  
Sta bën, adio, a s'udëi!  
Adio, alegta gioventù,  
Vo bon kumpani, mi plafhëi.  
Adio monc i vo valedes!  
Adio prei i vo stredes!  
Mi kar paefh, kin sun te  
Surëdl i luna da,  
L ruf per val ke va,  
Mi kuer for t' amerà.

Kanke unive inò da te  
Nshi aflit i amalà  
Sufri tlo i sufri ilò,  
Kun gran amor tu m'es levà  
Mi gran dulëur bën for i for,  
O bela val, mi bon dutor.  
Mi kar paefh, l mont t' amira  
Dal tēmp del bel dinstà,  
Kl ciel sarëin s'a fa;  
Da duc ies tu amà.

Via da te, mi bel' Gherdëina  
Me mëina nkuei da nuef la sort;  
Da te, Saslonk i mon' de Sela,  
Da vofh gran bel k' n' ie mo mort.  
O sëis vo doi mi protetores  
D'mi cësa, d'mi genitores,  
Mi kar paefh, kin sun te  
Surëdl i luna da.  
L ruf per val ke va,  
Mi kuer for t' amerà.

Leo Runggaldier.



## L saudè.

Mo n jède a l'oma i bosl la man,  
Po i cèlel mo drèt i difh bradlan:  
»Dlekordet', o loma, de me i sta nton,  
Prèja per me nfin k'inò s'udon!«  
L'oma cialan dut grama, zitran  
Sul cè al seniè i mètla si man.  
»Segur periè ulerei per tè,  
Tèniè' su drèt da bravo saudè!«  
El cinia de shi. Tla vièra iel po fhi.  
Trame doi la parola ai po' manteni:  
N' ie passà via truepes dis,  
K' èi doi s'a prèsh udù — — sun paravis.  
L fi mazà dala bala dl Rus  
I l'oma tosh morta, do dal ferdrus.

Franz Moroder.



## Senièur Matie.

(1770—1844?)<sup>1)</sup>

Ki ne kunèsh pa la cianties i la rimes de senièur Matie? O ce »vedla muta« ne se n'a pa nia abù n per mel a liefher si ciantia ke ti spiega bel m. pont ke »la ie fata« per èila? O ce »vedl mut« ne se l' a pa rissa kun senièur Matie i s' arà pensà: Reshon al! Nc' ie ne me lashe abinè ite:

»Eiles me dirà del dut,  
Ma ie reste vedl mut!«

Mbèn, de kèsh »vedl mut« ke foa for de bona ueja, ke n udova pra uni festa rifhan i ciantan i ke teniva for i autri allegri i kuntènc, de kèsh bon maester i ugrister, ke a nsenià i sunà a Urtifhèi, a Ciastel i a Persenon, de kèsh bon kronista, ke nutova su kun gran bria la nuèves i i fac da Urtifhèi i kèl ke ie suzedù i ani de vièra 1796 i 97 i 1809, de kèsh bravo kumbatant de Spinges i del Berg Isel, de kèsh nòsh poeta, ke pra uni mièur festa ruvova kun si cianties, tosh n gherdèina, tosh per tudèsk, rimes i mushiga dut fat èl nstès, de kèsh uem messons kuntè m pue de zeke.

Senièur Matie Ploner ie nashù a Urtifhèi l ann 1770. She si pere fova de Gherdèina o n tudèsk ne savonse nèus: l

<sup>1)</sup> La dates de kèsh artikul ie ora de »Das Grödner Tale de bera Franz Moroder da Lenert, Urtifhèi, 1891, pert 153 i 154.



etz. Nshi pon di, ke seniëur Matie ie sta l prim ke nes a fa kunëfhe, ai autri, ki ke son i ke rusnon feter unfat sk' i Friauli, i Rumauncr kēi dela Provans o de Katalonia.

Mo n jēde tol seniëur Matie l stlop sula shables i peja tla viëra, ma kēst jēde kul landsturm da Ciastel del 1809 sul Berg Isel.

Do bera Franzl da Lenert dëssel vester ruvã del 1830 ugrister dla pfor a Persenon. Ma nēus raton ke l sibe bele ruã dan l 30. Ilò a Persenon iel po nce mort, plu de segur l ann 1844.

Kēsta fossa la vitã de n uem ke a fat tant per Urtifhēi i per Gherdēina, ma ke fossa desminciã, she ne fossa si cianties, si rimes i si kumposiziõns i si kronikes ke l tēnissa n memoria. Te si ultimi dis s' an festediã tant del bravo poeta, kronist, maester ugrister, skrivan i kumbatant dē Spinges i del Berg Isel, ke n ne sa nce no segur, kãnke l ie mort.

O bel i rik Urtifhēi! Dlekordete di uemes ke t' a fa grant i kuneshù!

De si cianties n' onse me plu n valgunes. »La vedla muta« foa tel kalēnder del 1911, »L vedl mut« te kēl del 1912.

I na gran pert ie danz unides desdrudes da tei, ke udova massa fosk, davia ke les ti savova m pue massa mondanes i da massa n bon umor.

Kēstes ke ie kēst ann tel kalēnder, ke un o l auter kunesherà, nes a lashã skri shu bera Franzl da Lenert, i nēus l ringrazion de si servish. C.



## Koke Seniëur Bepo Mahlknecht, ugrister d'Urtifhēi, a da fe a giapè Stina del Sigat.<sup>1)</sup>

Da Seniëur Matie Ploner, ugrister a Ciastel (1800—30).

Fete da katif da sēnn!  
Kanke Seniëur Kristl vën.  
Ne te stilè inshi de lēn!  
Di: Bon di! Uniëise bën?  
Sëis unì? E bën drèt giën  
Ke uniëise a me kri.  
Ve spitan bën ert, shi shi.  
I kun vera impazienza,  
No me nēus — dut Urtifhēi!

<sup>1)</sup> Stina del Sigat fova la nipote de bera Kristl Perathoner del Sigat, ke stalhova a Firēnza i ova mandã sun si spëises l korp de San Benedēt ala dlietha da Urtifhēi.

Ve spitova ert — kël sei.  
Pitl i grant, uniu el sa,  
Ke sêis n uem dlonk stimà.  
Vo nes êis mandà i dunà.  
San Benedêt i si korp sant.  
Kêst ie nosta kuntentêza;  
Duc svajova kun legrêza.  
Pitl i grant ki mei udova:  
Viva bera Kristl, viva!  
El nes a mandà de bant  
Su si spêises n korp sant.  
Percie kl ie uem drêt bon i rik,  
L al dat debant a San Durik.  
Preja per nêus San Benedêt,  
Acioke vivonse bèn i drêt,  
I kanke on finà nosh dis;  
Ruonse su a Paravis!  
Bossi po drêt bel la man,  
Di: sêise bèn nton i san?  
Fei n bel gran kumplimënt;  
Ma ne unî drê tan ruënt  
A tukè la man a Stina.  
Ies unida? Kara mina!  
M' ues bon mo?  
Ies bèn ênke drêt nton?  
O shi, shi, te ciêles bon,  
T' es n bel gran sumenton!  
Po dirala: ciêla ve  
Kêsh dish prêst de maridè.  
Lasheme inant unî!  
Posse pa bèn mo tel di:  
O selinità festiva!  
Ciantes tu, ke duc udiva.  
Ie ulês na santa viva.  
No me l korp, no me l' os,  
Ma ke a pel i ciern a dos.  
Kike ntênt, m'a ntendù,  
Mo ne muesses di de plu.  
Viva, bera Kristl, viva!  
Ie ulês na santa viva.  
Po skota kiet i lasha fe,  
L vên pa bèn mo a sel de.  
A di del mat, kël ses tu bèn,  
T' en bot ne mazun n lèn.  
L maridè ie shike n fhuek,  
N muessa fe a puek a puek:

Tost sunè,  
Tost ciantè,  
Tost balè.  
Tost sauté,  
Tost shi, shi!  
Tost no, no!

La va pa bèn de do!  
Kanke Stina vuel ciantè  
Mèsses, vespres o tanives;  
Lasha pu fhi aut la pives!  
Po mèt verda, cièla ve  
I mustrève drèt katives,  
Lasha piesh i mans sauté!  
I fahède gran rumor,  
Kanke Stina vèn sul kor.  
A sunè pra l'klavier  
Lasha fhi la mans lesier!  
Sèn mèt verda dant al dut  
I cièla ke t' la giapes,  
Sèn auza su la tlapes,  
Nè sparaniè la soles,  
Nè sparaniè ciauzei,  
Nè sparaniè paroles,  
Nè sparaniè stivei,  
She Stina vèn de Mei.

She n auter vèn po ala ulèi,  
Po di: ce vues pa tu kujon,  
Po sauti pu me ti ciavèi  
I dai tel kul n bon kalzon.  
Perete! di: Sh' t' es piesh i mans.  
She no ne fhi plu a mutans.  
Tu ne unì plu te mi fava,  
O te akuse pra ti ava!  
Po diral: Lasheme fhi,  
Ie t' la lashe gièn a ti.  
Dai la beles, dai la bones  
I di: mi kara bona Stina,  
Ke tu, kè tu me toles  
Kun volontà divina?  
Shi, she l' ie drèt a Die,  
Dut bon, dut drèt, dut bel.  
Kèst skrish ènke Matie  
Tla kura da Ciastel.  
Tu ses bèn, ki ke son,  
Ne breve kun rikèzes,  
Ma ie t' ue eder bon

L laurova miec ke Simbl  
O ke l fova miëur ke l Limbl.  
A Sant' Ûfhëp messës de do  
Nce l pitl Hansl mo.  
Dut i fhiva bel de man  
La manea i l gran pajan,  
I fahova me te n bot  
Tost na mëisa o n kriniot,  
Na letieria oder n stuel,  
Na kuna o pifaruel,  
N shadunë o cie ke n uel.  
Per i paures de bona ercies,  
Dant a l'ega de bona bercies.  
Kula brejes de bieci gran pëc  
Kunciovel bën i tēc.  
Kurz, n tel bon zumpradëur  
Ne giapun mei n miëur.  
L fahova miec si arte  
Ke de fën l gran Bonaparte<sup>1)</sup>  
Sua maestà, mi scusi!  
I tuoi popoli confusi  
Aspettano i Russi.

Persenen, ai 17 de Merz 1813.



## Gratulation dei kari kurazians da Bula.

SVL St. InVeM DeL sIn. Vfhëp CVrat In BVLLa.

(de Seniëur Matie, 1828).

1. Aliëgri nëus da Bula!  
Fahëve nkuei unëur!  
Ne sparaniëda nula  
Al di de nosh pastëur!  
Vo uemes fhide dant,  
Tulëve l bel guant!  
I autri po prëst do,  
La vedles drët de do!
2. I uemes tole kitli,  
La brejes la fenans!  
Shikëde su ki pitli,  
Shikëve, vo mutans!  
Tolëde mo, vo grandes  
Sul cë bela gherlandes!  
La vedles per unëur  
L gran skuac da fëur!

<sup>1)</sup> De Setëmbër 1812 fova vardù fhu Moskau i Napolion oa messà mucè ora dla Rushia. Ma na gran pert di saudejes fova more dal frëid i dala fam. De Otober 1813 ova po Napolion inò perdù la gran batàlia de Leipzig.

<sup>2)</sup> SoteskriZION: nia da liefher.

Siehe, St. Josef tut uns lehren:  
Jeder halt' sein' Stand in Ehren,  
Gehe seinen Pflichten nach,  
Daß ein armer Handwerksmann  
Auch wohl heilig werden kann.

\* \* \*

Ie te bince uni bën!  
Es ntendù de fën?  
Lashete tu drët servi,  
Do duman ke l ie ti di!  
Di pu me a Mariëusa:  
Va i gëura su la bëursa,  
Kompra cie ke ie bel i bon,  
Porta su i nëus majon.

\* \* \*

Ki ke a tlo skrit,  
Ne uniral a ti dit.  
Ie me soteskrishe<sup>2)</sup>  
I tu n ses m po no, she ne tel  
difhe.

3. Kun bela prozeshion  
 A per, a man a man,  
 Po de briëda fhon,  
 Cigan i bel ciantan;  
 Tulon l gran tamburdl  
 Ke tire n drë gran urdl,  
 Ke l aude këi ke vën  
 I skote su da sënn.
4. I vën duc këi da Bula,  
 Ciantan, sunan, cigan.  
 No me la vedla Lula  
 Per ve prië de pan.  
 L ie kossa d' importanza,  
 Bincion de vera panza,  
 De vere kuer, shi, shi!  
 Fertuna for vosh di!
5. Auguron a seniëur kurat  
 Ke l stebe drët nton.  
 El ie daniëura stat  
 Kun nëus valënt i bon.  
 Dië debe si aiut,  
 Ke l vive mo drët giut.  
 Da nëus daniëura amà,  
 Tan giut k'el m'ei sarà.
6. Giauride su la musa  
 I duc ciantëde do.  
 Degun ne tire skusa  
 I sveje kël ke l po,  
 Per fin ke on saliva,  
 Svajëde pu me: viva!  
 Viva seniëur kurat,  
 Nshi saral bën fat.
7. L ie stat na desfertuna,  
 Ke duta Bula l sa.  
 I duc bradlova ad una,  
 Ke l Pimperl ie krepà.  
 Dei cians i plu valënc  
 Zanovel bel kui dënz.  
 Kapiva prëst: Wart auf!  
 Geh, Pimperl, friß und sauf!
8. I kël pitl ucel,  
 Ke fova propi blot,  
 Ciantova drë tan bel,  
 Al dat a Mëine Kot.  
 Mi bon seniëur kurat!  
 Tlo ëise fat da mat.  
 Ie muës drë vel di  
 Vo dais me vel teni.
9. Dut kel ke v' ie de uega,  
 Messëise ve teni.  
 She un ulës la kuega  
 Dìfhëise pa de shi?  
 Je krëje bën de no.  
 Ma sh' un la vuel pa mpo  
 Per fën se maridë,  
 Messëis mpo i la dè.
10. O bon seniëur kurat!  
 Audide a bon kont!  
 Ne sëise pa tan mat,  
 A fhi mo sëura mont.<sup>1)</sup>  
 Vo sëis mo fhëun i sann,  
 Per nëus fossel n dann.  
 Sarëis bën mo zakan  
 Mpo giut assë pluan.
11. Pastor de nosta ana!  
 Menënes su al ciel,  
 Ulà ke n maja mana  
 I drë bon niok da miel.  
 Vardëde nosh mutons  
 Da bieshes i kastrons!  
 Vardëde la fenans, —  
 Kla furbes de mutans!
12. Svardënes dai maļans,  
 Krauniëde këi Lumberg,  
 Dìfhëde ala mutans  
 De no fe plu basterc!  
 Vardëde ke deguni  
 Sëura i sot Kuntruni  
 Nè vede a se danë  
 Tel infern po a keghë.

<sup>1)</sup> L kurat ruva via n Badia.

13. Svårdēnes dala stries,  
Rie ēiles del malan.  
Les ie diaulmēnter ries,  
Nes fejh suēnz gran dann.  
Nes tira sula kresta  
Na bela gran tēpesta.  
Per Triek ciacēles fhu,  
Fafhēi la krēush lessù.
14. Les ie tēl vedla pestes,  
Ke n' a mo mei giapà.  
Les ie mpo mo lestes  
I sauta n krēp ka i la.  
Les pruēta sun Bulacia,  
Fafhēi me n pue la ciacia.  
Mustrei' vosh puni senià,  
Udēis pa ke les va!
15. Sēn onse bel' ciantà,  
Sēn dēssel pa bastē.  
Nēus on del dut bincià;  
Sēn fhonse a gustē.  
La kuega porta su  
Del dut assē i plu.  
Da' bever plu k' assē,  
Ke n posse drēt cighē.
16. Salute! bon seniūr!  
Kul got n tela man  
Buonse a Vost unēur,  
Vivēde giut i sann!  
Nkuei de Vosta festa,  
Shaudonse drēt la tēsta.  
Stahon aliegramēt,  
Potztausend sapramēt!



## I ciastiei de Gherdēina.<sup>1)</sup>

Shike belau uni val del Tirol, nshi a ēnke Gherdēina i a abù si ciastiei. Danz ke de na pert de kish ciastiei san al di da nkuei puek i nia, percie ke i vedli da zakan ne skrifhova tant ke vēn skrit nkuei kun di; po muēssen ēnke pensē, ke la mashera pert de kish ciastiei ie uni desdru i per kēl iel ēnke fhi perdūes truepa skritures, ke povester pudēssa nes kuntē, kan i ko i da ki ke kish ciastiei fova unii fabrikēi. Ma mpo dēssa l kalēnder ladin kuntē ce ke n sa di ciastiei de Gherdēina. Skumencion kui ciastiei de Sēlva damprō ora.

### 1. L. ciastel te Val (Wolkenstein).

L ciastel te Val ie segur l plu vedl di ciastiei de Gherdēina. Kan i da ki kl ie uni fabrikà ne san per auter. N konta ke n grof d' Italia, ke ie mucia da Attila,<sup>2)</sup> l ebe fabrikà. Ma kēsh

<sup>1)</sup> Kunfronta specialmenter »Das Grödner Tal« de Bera Franzl Moroder-Lenert, St. Ulrich in Gröden, 1891, 2. Aufl. 1914.

<sup>2)</sup> Attila fova dal ann 434 fin al ann 453 l rē dei Hunni ke abito va t' Asia. Da ilō iel unl kun mez milion de fhēt tel' Europa per fundē n gran rēni. El ulova avēi mashimamēnter la Franzia; ma ilō al perdū la viēra l ann 451. Do iel rot ite t' Italia i a desdru Aquileia; l Papa da kēi tēmps k' ova inuem Leo I. ie fhit ankontra a Attila i l a prejā ke l debe ēuta. Attila a fat al sēnn, do ke l ova re cevū na gran soma de grosh. Sul viac per fhi a cēsa iel mort propi la nuet de si noza l ann 453.

## L. Shoz dla dliefha de Val.

Te Val, de la dala dliefha de San Salvester nâshel na funtana d' ega.

Dan plu cënt ani vardova n di d' instà doi mutans de Sëlva la vaces ite per kla pastures. Per se parè via l' aurela longia, s' oveles sentà fhu da ufhin da ksta funtana i se kuntova stories:

«Tu,» dish una de ksta mutans, »ne n' essa mei audi kün tan, ke te ksta funtana dëssel vester truep grosh askendui?»

«O she n' essa duc ki grosh ke ie tlo te Val askendui,» respuend l' outra, »tan de vaces pudëssun ma mei se kumprè!»

«Nosta doi plu bela manfes dahëssi bën ka, se giatësse n poz de dinei» dish inò la prima.

N kël mumënt, ke l' a abù di kësta paroles, nash ora de funtana n gran poz kolm de dinei lucënc d' or, i doi lëufes blanc fier de Kedul fhu i ti sauta tel kol ala doi plu bela manfes. La mutans, kanke les a udù i lëufes, skumëncia dala tēma a kerde i svajë n ajut.

I lëufes lasha la manfes i mucia, i tel medemo tēmp arsësh nce l poz kui grosh inò te funtana.

Da ntlëuta inkà ne n' an plu mei nreshi nia del shoz de Val.  
T. P.



## La slites.

1. Cincin cincin, cincin cincin!

Audide la brunfineres!

La slites vën: cincin cincin,

Ciavei ke lufh da stleres.

2. I vën a trot i a sparon

Da Kol dala Peldà ite.

Na pert ie bele fha Pigon,

Prësh passi pa tlo ite.

3. Nkuei ulonsa m pue i cialè

A kish ke vën n slita:

She n ie de tei da maridè

Per via de vel desdita.

4. A tei dëssun fe la sief

I m pue i fermè la slita;

Po i de l kunsëi, ke tala Plief

Poi fhi a ste si vita.

5. De burta fhēunes skiva m pue  
De fhi nkantēur n slita:  
Puer ēiles: ie danz mila zue  
Ad ēiles per si vita.
6. La beles sēnta su tan giēn,  
Ke l per, ke les sibe stances;  
Ma i dīfh, ke les ie tan reres fēn,  
Ades sk'la moshes blancs.
7. Sēn ruvles tlo; unide a udēi!  
Unide ka i cialēde;  
L ie la slites da Urtīfhēi;  
Cialēi a unā al jēde.
8. Ce lingia longia! Tan de fhēt!  
Ce guanc, ke felh paruda!  
Blot or i sēida i arfhēt,  
Gurmei po ke stramura.
9. L knēidel ie daniēura mo  
N bel ciapel dad ēila;  
Ma la kazina uel m po  
Se fe udēi no' ēila.
10. I ēisa po cialā ai ēi?  
L plu kun brejes kurtes;  
Al moto i sa nce a Urtīfhēi  
La longes massa burtes.
11. Shi, shi: la modes da zakan  
Vēn for mo respetedes;  
La nueves vēigun for mudān  
I massa prēsh zaredes.
12. Ce bel ke l fos, cincin, cincin  
Avēi n grum de slites,  
Ciavei assē i dut l vin  
Del lont i no debites.

Sen. Shambatista da Sotatives.



## Proverbi.<sup>1)</sup>

Roba de forza  
Ne vel na skorza.

<sup>1)</sup> La masherā pert de kish proverbi a nutā su Ushepantone Pe-  
rathoner de Kol da Mēssa.



Ne di de n mort  
Mei vel de tort.

A tenì kont del puek  
S' abinun n huek.

Roba rubeda — ne reda.

Velk sa uniun  
Dut degun.

L fat de n mat  
Ne vel n skat.

L sapient pēnsa truep  
I refhona puek.

Lat i vin ie tuesse fin,  
Vin i lat ie tuesse fat.

Dime, kun kike te ves  
I, ie te difhe, kike tu ies.

Dal avaron  
Vēn l trapulon.

Kike refhona truep, sa puek,  
Kike sa truep, refhona puek.

Ti ambizion  
Sarà ti perdizion.

Kanke ne ie  
No pan te skrin,  
No farina te ciadin,  
Po va l amor su per ciamin.

She uniun skova dan si porta, iel dlonk nēt.

Tenì dala spina i lashè fhi dal kaukon.

N ref fehh na luegia a n pan.

Kanke l giat ie ora de cēsa, a la surices segra.

La baufhies a la giames kurtes.

Avēi i uedli mafhri ke l vēnter.

Una man leva l'otra.

L giat ne lashà de piē surices.

Nia dut, cieke lufh, ie or.

Fe l kont zēnza l ost.

Na ghernea nueva skova bēn.

N cian ke baja ne mort.

kont tan da maladèt, me toli ie la prima tupa i l'oma giapa la segonda i la terza resta po a ti, per ti gran sapienza!» C.

Sesa, ecke ie sparanië? Sparanië ie, kanke un a na baruja via do l kol i l'adrova per buton a se takè l èur.

\* \* \*

### N valguna regules dal tēmp.

(De sen. Ufhepantone Vian, kurat a Urtifhëi, mort 1880.)

She seslon al ciapel dekà,  
Na plueja ne mancerà.  
She seslon al ciapel delà,  
Kel di bon tēmp sarà.

She kël sas te ciulè  
Skumēncia a suè,  
La plueja unirà prēst,  
Kerdēme kēst.

Finke la rondules fhola bas,  
Ne sarà mei sut kël sas.  
Finke la rondules ne peja via,  
Da rie tēmpes ne temēde nia.  
She la siēles ie a liet tel fluri  
Arēise stram, ma no graniei inshì.

\* \* \*

### Ora de Val Grata.<sup>1)</sup>

Te Val Grata ovi n jēde da fe kemun i da se kungsiē de na kossa drēt d'importanza. Acioke i uemes de kemun ne vēnie desturbei, ovun metù su na guardia ku na lancia dan porta dla cēsa de kemun, ke ova l kumant de nē lashè ite deguni. Ngali n vēniel un ke uel ite. Ma la brava guardia ti fier per mez kula lancia i sveja: »Fermete, tlo ne dausa ite deguni!« Ma l auter respuend: »Ie ne ue pu no fhi ite, ue me unì dala ite ora.« — »Ah nshila, kēsh ie zeke d'auter!« difh la guardia i l lasha passè.

\* \* \*

Un de la medema val, ke ova n barifhel de vin te ciulè, se n'ova ntendù ke zakei fhiva a in rubè. Per sprigulè l lere al takà n gran cian pra la spina; ma l cian a petà ngali n zer i a zarà ora la spina, ke dut l vin ie regors ora via per ciulè. —

<sup>1)</sup> Te Gherdēina vēniel kuntà de blota pitla stories de Val Grata (Villgratental). Kì pudēs pa nes fe l plafhëi de les nutè su?

Se furni kula pientles di autri.

I uedli ie l spiedl del' ana.

N zetl sēul ne vert giut.

\* \* \*

L pluei da duman ie ske l bal dla vedles.

### Pensieres i sentēzes.

1. De shaldi kosses sun kēsh mont  
Fashionfe i tēnionfe kont;  
A mile d'autres n' abadons,  
I outra mile n' uservons.
2. Ne mancia roba sun kēsh mont.  
Del dut iel propi bel mpont:  
De bēn, de mel, de bel, de burt,  
A ulēi l di me bel n kurt.
3. L ie legrēzes zēnza fin,  
Ma danz tristēzes dlonk daufhin.  
Ki n'a pa muejes de vel sort?  
A ki n' i vēn pa mei fat tort?
4. Nkuei kumēt un n delit,  
Duman vēn bele n auter skrit;  
I do duman n mafher mo,  
I po l di do doi sēura pro.
5. She n vēn kaprō, damandun riēsh:  
Difhēme: iel pa velk da nuef!  
Ma damandan an tēma prēsh,  
Ke sibe vel de mel ke pluef.
6. Kēl s'a amalà, i kēl ie mort,  
A n auter i iela fhita stort,  
A kēl i iel brufhà fhu l tublà.  
Sēn ēis audì la novità.
7. La novitejes per l plu  
Ie vel de burt — kerdēme pu.  
»N'ie nia da nuef« me sa l plu bel,  
Po sei a cieke son, bel snel.

Sēn. Shambatista Ploner da Sottanives.

\* \* \*

L'esperienza ie n bon liber, mi fi;  
Ilò posses te liefher uni di.  
Per tan akort ke te ratoves  
I tan da totl ke te foves.

Franz Moroder.

\* \* \*

(Da skri sula pelda dla Madona).

Tu ke te passes, o sta kiet m puek  
I saluda ti oma nce te kësh luek.  
Te ses pu, tan a kuer ke me sta ti bën  
I ke posse te fhudè tan giën.  
Kun fiduzia la plu pitla urazion  
Te purterà konsulazion i benedishion.

Franz Moroder.

\* \* \*

Tan de pëines per parveni,  
Tan d' autres per se manteni,  
Tan de lëur pèr se nuri,  
Tan de sufranzas per muri.

Sepl da Passua.

\* \* \*

// Këi k'a dad avëi, a plu de memoria, ke këi k'ie debit. S.d.P.

\* \* \*

Die nes da la kuces, ma l ne les fruza nia su. S.d.P.

\* \* \*

She t'ues mparè a skutè, po muesses te maridè. S.d.P.

\* \* \*

La fertuna ie na kodla, ke i kuron do, kanke la kor i ki  
dafhon de pish, te kela ke la se ferma. S.d.P.

\* \* \*

La vita ie na batalia, kël ke mor ie segur de giatè la krëufh.  
S.d.P.

\* \* \*

La muejes nes vën suenz da këi k'on l plu giën. S.d.P.

\* \* \*

L' dubità ie n bushën dla rethon, la fede n bushën d kuer. S.d.P.

\* \* \*

Kike vif me de speranza, ie tl perikul de muri da fam. S.d.P.

\* \* \*

Dlekordete, ke la realità ie daniëura sota l' ilufhion. S.d.P.

\* \* \*

Vel de plu burt ne iel nia, ke la superbia kun la stracia. T. P.

\* \* \*

### La bolp i l korf.


#### Fabula.

La bolp ie fhita n di a ciacia i s' a skendù te na pitla siena. L ne dura giut, fhola n korf a da lerk i se sēnta suna rama de ksta siena. La bolp, ke ne n' ova mo mei udù tan n gran ucel, se spiërd drēt ala pesta. — Kanke la l a abù m pue kunshidrà i ke l' a udù, ke l ne ie n tier drē perikulëus, se tolela l kuragio de rusnè i dish bel da smielera: »Bon di, berba! de ce vières per streda?« — »Ie,« respuend l korf, »ie vede a me kri mi marēnda.« — »E i ce majesa po?«, damanda inò la bolp drēt da maliziëusa. — »Jërmes i d' autri pitli tieres«, dish l korf i fhola fhu de rama a tlupè su n jërm ke se sterfloa bel plan via per tiëra. — »Ie maje bën nce de gran tieres, ie« dish la bolp se la rifhan krudel-mēnter; i n kël mumēt i arsëshela al kol al korf i l zera. — L ie daniëura miec a ne se de fhu ku nen smieler i maliziëus, per via tert o a benëura te la faral de segur. T. P.

\* \* \*

### Gefhù Kristo i l fret.

Kanke Gefhù Kristo i S. Piere fashova n jède n viac, s'ovi falà la streda. Ngali fovi ruvei pra un petà fhu bon sauri te na bufha. Èi l damanda, ulà ke l ie da fhi. Ma kēfh fova tan fret ke l a me drē mustrà m pue ku na giama zēna di velk o levè su. Po vai mo m pez i ruva pra na fhëuna dan na porta ke lavova i èi damanda inò do la streda. Kēsta ie drēt da maniera, lasha de lavè i va peja lonc, lonc fina su nen kol a i mustrè, k'i ne pudèsse plu se falè. Po iela inò unida zeruk. »A kēsta fhëuna assaise du i de velk per kël ke la ie stata tan volontiva« a dit S. Piere a G. Kristo. »Kel fret tla fhu ti dei pa« respuend G.




# Badiot.

## Ciantia dai jagri.

Fora dia proema opereta ladina »Le ciastel dles stries« d'Angelo  
Trebo †, komp. da Sepele Frontull.



Tenori. *Valgamia snel.*



*mf*



I. Soe al alt scen munt, o - là k'al ronde-

Bassi.






*cresc.*

nësh, soen ki krëp, o - là ke l cieof flo - rësh, o - là k'an

vëiga Edel - weiss assà i le cieof dal ton flo-

*mf* *pp* *(Ecco)*

rësh de Ma: Soe scen ki gran krëp, ki gran krëp,



ju ores k'i fos, -res k'i fos, soe soen ki gran

krëp, krëp, ju o-res k'i fos, -res k'i fos.

II. Ola k'al sta ciamure soen ki banc bi vërc  
 I salta par ki krëp tan ërc;  
 Ola k'i jai a so bel post da ste  
 I famëis ko cianta doet l de: (Refrain.)

III. Ola k'an alda spo prodadus cianten  
 I varices da sas al alt skrajën;  
 Ola k'i lei e desko nëi tan bi  
 I les es se tol dles flus la mi: (Refrain.)



## Dalunc dla patria.

(Ai 2 de Forà 1887.)

I. Dalunc dla patria dlunk drumblen,  
 Dalunc tres net i ont  
 Mo porteste demez dasenn,  
 Ciaval da fü liront.

II. Soront i su te kcesh bagun,  
 I sun atlò sontè,  
 Ci nëi kal e defora dlunk!  
 I vigne rü dlacè.

III. I dlungia ia desko bai  
S'an shampa vigne lèn,  
Ombries foshes fesh i vai  
I al ci la lœna vèn.

IV. Ciamò na ota ciari ndo  
A ki bi krèp d' arfhont,  
Na frizia i vèghi bèn ciamò  
Dalunc tal firmament.

V. Mo ince ki ne vèghi plü;  
Dagnora plü i plü inant  
Mo porta ia le ciar da fü,  
A dœt i shampel dant.

VI. Os beles munts dla patria, adio!  
A kan k'i vègni ndo,  
I fosh ne dœrera plü dio  
K' i passi ndo atlò.

† Angelo Trebo.



## Le bal.

I. Alo, aldide, la mufiga sona,  
Shide, tolede la lita düc kanc!  
Alo, tolese atira na fhona  
Ciodi pa stèife sontés scœn ki banc?

II. Shones, morshel fèn la punta alzede!  
No se lashede bèn dio periè,  
Frèsk scele takt n bel bolzer balede  
Zonza a kël ko se mœna i ciarè.

III. Mo rekordese da mèter bel verda,  
Amor, kel picio maligno s'askogn  
Danter os ete i se fesh pa na berta;  
Dhunk al se vèigo os fhones i fhogn.

IV. Kan k'an se ponsa le manko dagnora  
Tirel i tœnel dër trat le barest,  
Tif spo tal kœr la saita se fora  
I se roina dla vita le rest.

† Angelo Trebo.







N shizer da Pruca.

## Valk per ki da Kol.

Per la sekonda ota me permete  
De ve di na parola;  
Spere ke ogni un azete,  
No intende po de ve fa skola.

Per ladin voi deskore,  
E anzi dut in rima;  
No konta nia per valgune ore  
Basta pur ke no devente puina.

Sion ladign tant noi ke i Ampezagn,  
I Gherdener e i Badioc,  
Ki de Vinaulonk e Fashagn,  
Tant ki kruf ke ki koc.

Noi duc de ste valade  
Ladign volon resta;  
E mi me piasarave  
Sta lingua la conserva.

Melchiore Colleselli.



## La cioura mula.

L e ruè la cioura mula via Livinè,  
 Sun fegolè l' e s'heuda e m'a stravè l. kafè.  
 L' e touta e via n stala l' e menada,  
 Ma zenza ke m' entane l' e shampada  
 Delongo sun tablè a me rentè  
 Su dut el fen e dut el meshedè.  
 Me pense, voi pa la menè via Ronkat,  
 Ke forshi la me da pa bon pazon de lat;  
 Ma trei o kater dish davò  
 Mi e mossù fhi a la to,  
 Ke la i shampava sula fava dei Ronkac  
 E la i mangiava duc i kosoi koi balac.  
 Passè Sotil son ruè fha Molinat:  
 »Sta ria cioura ve no da pa lat,  
 Te pos ben prast ie fe la fin.«  
 La dish la Angela da Molin.  
 Mi passe per Retic  
 I difhe ke l e n mestic.  
 Kon gran fadia rue su sun Kol  
 E per fortuna la me felh azol.  
 Me pense, voi pa i la menè su al benefiziat,  
 Ke l a pa n klap de giac, ma ciarestia ben de lat.  
 Ko son ruè sun plaza,  
 L' a fat na gran baraka.  
 Me tole kasta cioura e tourne via Brenta,  
 Ma fha Finazzer la ie strava la polenta.  
 Shu dale Brue  
 La fesh le sue  
 Via n Kanadac son ruè dut spaventè.  
 Ilò n te un da Laste m' e nkontè:  
 »Cio, cio, sta cioura l' e dla fia de Shan del Sho,«  
 L me dish e ie respone dart kontent daspò:  
 »Mi vade a kerì sti Shan  
 Ke son pa stuf de pajè dan.«  
 »Kilò Terefha t' as tua cioura, ei!«  
 — Po, berba, cioure mi non e bu mei.«  
 »Shi, shi, Terefha, ilò dovò malfhon  
 Mi t' e pa ben vedù a te fe l pazon.«  
 — La cioura no la voi pa to,  
 No se ve ulà la mete spo.«  
 De bota sauta for de cesa el Sfersè.  
 »Po tola ke te de pa stala kon tablè  
 E a la vesholè te basta fhi sun Pre longiè,  
 Te vedaras ilò l e n klap de ciuf da pelè.«

# Ampezan.

## Ra bela Ampezana.

Ci elo la ke tanto skiza  
Inze fora par stradon?  
N' Ampezana ra<sup>1)</sup> se stiza,  
Se kurios nos se mostron.

Cie na siesta!<sup>2)</sup> Io son pizo<sup>3)</sup>  
A fi pede — ma pardis!  
Ke par esse el so noizo  
Darae mezo el paradis.

R' a ki ocie lustre, more,  
I te brufha pi del sol.  
Ra se ciapa dute i kuore;  
Alabastro l e el so kol!

L e kel vis ke duto quanto  
L e na festa de kolor,  
El naseto l e un inkanto,  
Proprio denio del pitor.

Ki pomete<sup>4)</sup> ei mo bie?  
De natura l e kel ros;  
Kome l ebano i ciaei  
E l e un' arpa ra so osh.

Se i so labre ra daverfe  
E ra mostra i so dentis,  
O, senz' outro ra desquerfe  
Duto quanto un paradis!

A ra un estro<sup>5)</sup>. R' e na ruosa<sup>6)</sup>  
Io vel digo in verita:  
Kel ke ciapa kera<sup>7)</sup> tosa  
Na fortuna ciapara.

Per kai de Gherdina spiegonse vel parola:

<sup>1)</sup> Ra = la.

<sup>2)</sup> siesto = da ulai bon, blot, (herzig, nett).

<sup>3)</sup> pitl = klein.

<sup>4)</sup> masseles = Wangen.

<sup>5)</sup> Schneid, sicherer Gang; Begeisterung.

<sup>6)</sup> rofhula = Rose.

<sup>7)</sup> kera = weibl. Form von kel = jener.

I ne tante ke domanda,  
Se par duta sta zitas,  
Kera toses d'ogni banda,  
Se l e sta granda raritas.

Io i respondo: Nol pos krede,  
Vel seguro senza fal:  
Ke bel sango no se l vede,  
Ke in Ampezo par ra val.



## Da una satila<sup>1)</sup> d'Ampezo del 1848.

O, voi vede, se i ra ciato,  
Se i ra tolo del so ves,  
Se zavario,<sup>2)</sup> se son mato,  
Kome e l dito del paes.

Una kanzon voi bete so<sup>3)</sup>  
Proprio in zel dialeto nos;  
Ki ra intende ki ke vo,  
Tanto el furbo kome el gros.<sup>4)</sup>

Non okore tanto ston  
Par intende kesta ka,<sup>5)</sup>  
Ke ra intende ank' un kojon,  
Ke no sepe el beabà<sup>6)</sup>.

I ra molo a kera sente,  
Ke fesh outo e anke bas;  
Voi parlà fora di dente  
Ki me daghe po del nas.

Da un por mai ke son  
A ki siore in ku i ra kazo;  
Perkè sa, da ra preshon  
Ei na fuga, ke me mazo.

Io lavoro a ra segura,  
Ke se i vo se vendikà  
De sta strofa a ra pi dura  
I po beteme a pausà.<sup>7)</sup>

<sup>1)</sup> Satire, Spottgedicht.

<sup>2)</sup> She fantineje, (ob ich spinne).

<sup>3)</sup> bete so = skri fhu, (aufsetzen).

<sup>4)</sup> totl, (der Einfältige).

<sup>5)</sup> kesta tlo; ka = frz. ça.

<sup>6)</sup> Beabà = das A-B-C.

<sup>7)</sup> I po me mèter a pausè.

Ma son pien d'umanità,  
Ke in me stesso ei fato el pian:  
Di ra pura verità,  
Kome deve un bon kristian.


De di poko; ke mangare  
Me podesse sbramosà;<sup>1)</sup>  
Ma parbio sun certe afare  
No me fido a tocià.

Ki ke no ra vo senti,  
Ke i se volte pur in la;  
Sa l esordio<sup>2)</sup> l e feni,  
S' avè voja, tabakà.

---

<sup>1)</sup> di do massa, se slavè la musa.

<sup>2)</sup> skumënciamënt, (Anfang).





# Engiadin.

L'ann passà v'onse cuntà m pue de zeke dei Romaunc del Grishun (Graubünden) i kest ann ulonse ve de na prova de si parlè. Kèsta poesia i i proverbi ie del rusnè ladin d'Engiadin.

## Alla lingua materna.<sup>1)</sup>

(de Gudench Barblan.)<sup>2)</sup>

1. Chiara<sup>3)</sup> lingua della mamma,  
Tü sonor<sup>4)</sup> romantsch ladin,  
Tü favella<sup>5)</sup> dutscha,<sup>6)</sup> lamma,<sup>7)</sup>  
Oh, co t'am eu sainza fin!
2. I teis suns cur<sup>8)</sup> eir<sup>8)</sup> in chüna  
M'ha la mamma charezza,  
E chanzuns dell' Engiadina  
Nell' uraglia m'ha chantà.
3. Millieras regordanzas  
Svagl<sup>9)</sup> in mai teis pled<sup>10)</sup> sonor,  
Svaglia saimper veglias spranzas  
Chi ün di han moss meis cor.
4. Chara lingua della mamma,  
Tü sonor romantsch ladin,  
Tü favella dutscha, lamma,  
Oh, co t'am eu sainza fin!

\* \* \*

## Proverbi.

Roba mel acquistada  
ha cuorta dureda.

Megl sulet, cu mel compagno.

Chi vuol fer addret a tuots, nun soddisfò ingün.

Amor vuol guerra.

<sup>1)</sup> Ora de «La musa ladina» de Peider Lansel, Samedan, Engadin Press Co. 1910. <sup>2)</sup> nat a Mnà (Engiadina) 1860, magister pro la scola chantunala agricola «Plantahof» a Landquart. <sup>3)</sup> liec «Chiara», ch = tsch! <sup>4)</sup> da n bon ton <sup>5)</sup> lingua, rusnè. <sup>6)</sup> deucia; <sup>7)</sup> muhèla; <sup>8)</sup> kanke fove; <sup>9)</sup> deshèida; <sup>10)</sup> parola.